

# 菩薩摩訶薩欲知四緣義當學般若波羅蜜

「大智度論」集粹之三十一

智  
銘

佛言：「菩薩摩訶薩欲知諸法因緣、次第緣、緣緣、增上緣、當學般若波羅蜜。」一切有爲法，皆從四緣生，所謂因緣、次第緣、緣緣、增上緣。

因緣者：相應因、共生因、自種因、徧因、報因，是五因名爲因緣。一切有爲法，亦名因緣。

次第緣者：除阿羅漢過去、現在末後心心數法，諸餘過去、現在心心數法，能與次第，是名次第緣。

緣緣、增上緣者：一切法。

菩薩欲知四緣自相、共相，當學般若波羅蜜。

論者謂：因由果生，若果無因，則果亦無。般若波羅蜜中，四緣皆不可得。是論以因不知般若波羅蜜相故，般若波羅蜜，於一切法無所捨，無所破，畢竟清淨，無諸戲論。如佛說有四緣，但以少智之人，著於四緣而生邪論，爲破著故，說言諸法實空，無所破。如心法從內外處因緣和合生，所謂受、想、思等。是心心數法，同相、同緣故，名爲相應。心以心數相應爲因，心心數法以心相應爲因，是名相應因。相應因者，譬如親友知識，和合成事。共生因者，一切有爲法，各有共生因，以共生故更相佑助；自種因者：過去善種，現在、未來善法；過去、現在善種，未來法善因。不善、無記亦如是。如是一切法，各有自種因。徧因者：苦諦、集諦所斷結使一切垢法因，是名徧因。報因者：行業因緣故，得善惡果報，是爲報因。是五因名爲因緣。心心數法次第相續無間故，名爲次第緣。心心數法，緣塵故生，是名緣緣。諸法生時，不相障礙，是爲無礙。

復次，心心數法從四緣生；無想、滅盡定從三緣生，除緣緣外；諸餘心不相應諸行及色，從二緣生，除次第緣、緣緣。有爲法性羸故，無有從一緣生。報生心心數法，從五因緣生；不隱沒無記，非垢法故，除徧因。諸煩惱亦從五因緣生，除報因。何以故？諸煩惱是隱沒，報是不隱沒，故除報因。報生色及心不相應諸行，從四因緣生；非心心數法，故除相應因；不隱沒無記法，故除徧因。染污色及心不相應諸行，亦從四因生；非心心數法，

故除相應因；垢故除報因。諸餘心心數法，除初無漏心，皆從四因生，除報因、徧因。所以者何？非無記故除報因，非垢故除徧因。諸餘不相應法，所謂色、心不相應諸行，若有自種因，則從三因生。除相應因、報因、徧因；若無自種因，則從二因生，共生因、無障因。初無漏心心數法，從三因生：相應因、共生因、無障因。是初無漏心中色及證不相應諸行，從二因生：共生因、無障因；無有法從一因生。若六因生，是名四緣。

菩薩行般若波羅蜜，如是觀四緣，心無所著，雖分別是法，而知其空，皆如幻化。幻化中雖有種種別異，智者觀之，知無有實，但誑於眼。爲分別知凡夫人法，皆是顛倒虛誑而無有實，故有四緣，如是云何爲實。賢聖法因，從凡夫法生故，亦是不實，如先十八空中說。菩薩於般若波羅蜜中，無有一法定性可取故，則不可破。以衆生著因緣法故，名爲可破。

菩薩觀知諸法從四因緣生，而不取四因緣定相。四因緣和合生，如水中月，雖爲虛誑無所有，要從水月因緣生，不從餘緣有。諸法亦如是，各自從因緣生，亦無定實，以是故說：菩薩欲如實知因緣、次第緣、緣緣、增上緣，當學般若波羅蜜。

阿毗曇亦有四緣義，初學如得其實，求之轉深，入於邪見。諸法所因，因於四緣，四緣復何所因？若有因則無窮，若無窮則無始，若無始則無因。若然者，一切法皆應無因！若有始，始則無所因，若無所因而有，則不待因緣。若然者，則一切諸法亦不待因緣而有！復次，諸法從因緣生，有二種：若因緣中先有，則不待因緣而生，則非因緣，若因緣中先無，則無各各因緣。以戲論四緣故，有如是等過，故不應學阿毗曇四緣義。如般若波羅蜜不可得空，無如是等失。如世間人，耳目所睹生、老、病、死，是則爲有，細求其相，則不可得。以是故，般若波羅蜜中，但除邪見，而不破四緣。是故言：欲知四緣相，當學般若波羅蜜。

佛言：「（菩薩摩訶薩）欲知諸法：如、法性、實際，當學般若波羅蜜，應如是住般若波羅蜜。」諸法如有二種：一者、各各相；二者、實相。各各相者，如地堅相，火熱相，風動相；如

是等分別諸法，各自有相。實相者，於各各相中分別，求實不可得，不可破，無諸過失。如自相空中說：地若實是堅相者，何以故膠、臘等與火會時，捨其自性？又破地爲微塵，以方破塵，終歸於空，亦失堅相。如是推求地相則不可得，若不可得，其實皆空，空則是地之實相。一切別相，皆亦如是，是名爲如。

法性者：如前說各各法空，空有差品，是爲如；同爲一空，是爲法性。是法性亦有二種：一者、用無著心分別諸法，各自有性；二者、名無量法，所謂諸法實相。如持心經說：法性無量，聲聞人雖得法性，以智有量故，不能無量說，如人雖到大海，以器小故，不能取無量水，是爲法性。

實際者：以法性爲實證，故爲際。如阿羅漢名爲住於實際。如、法性、實際三者，皆是諸法實相異名，所以者何？凡夫無智，於一切法作邪觀，所謂常、樂、淨、實、我等。佛弟子如法本相觀，是時不見常，是名無常；不見樂，是名苦；不見淨，是名不淨；不見實，是名空；不見我，是名無我。若不見常而見無常者，是則妄見，見苦、空、無我、不淨亦如是，是名爲如。如者，如本；無能敗壞。以是故，佛說三法爲法印：所謂一切有爲法無常印；一切法無我印；涅槃寂滅印。

般若波羅蜜經中，了了說諸法實相。有人著常顛倒，故捨常見，不著無常相，是名法印。非謂捨常著無常者，以爲法印。我乃至寂滅亦如是。般若波羅蜜中，破著無常等見；非謂破不受不著。得是諸法如已，則入法性中，滅諸觀，不生異信，性自爾故。善入法性，是爲實際。

聲聞法中，亦有說如、法性、實際、但少耳。如雜阿含中說：「有一比丘問佛：一緣法，爲是佛作？爲是餘人作？」佛告比丘：「我不作十二因緣，亦非餘人作。」有佛無佛，諸法：如、法相、法位常有，所謂是事有故是事有，是事生故是事生；如無明因緣故諸行，諸行因緣故識，乃至老死因緣故有悲憂苦惱。是事無故是事無，是事滅故是事滅，如無明滅故諸行滅。諸行滅故識滅，乃至老死滅故憂悲苦惱滅。如是生滅法，有佛無佛常爾；是

處說如。如雜阿含舍利弗師子吼經中說：佛問舍利弗一句義，三問三不能答。佛少開示舍利弗已，入於靜室，舍利弗集諸比丘，語比丘言：佛未示我事端，未即能答，今我於此法，七日七夜，演說其事而不窮。復有一比丘白佛言：佛入靜室後，舍利弗作師子吼而自讚歎！佛語比丘：舍利弗語實不虛，所以者何？舍利弗善通達法性故。聲聞法中，觀諸法生滅相，是爲如；滅一切諸觀，得諸法實相，是處說法性。

實際無因緣，故是處但說如、法性。實際即是涅槃。涅槃種種名字說，或名爲離，或名爲妙，或名爲出，如是等則爲說實際，但不說名字，故言無因緣。復次，諸法如者，如諸法未生時、生時亦如時。生已過去，現在亦如是；諸法三世平等，是名爲如。諸法實相中，三世等一無異。如般若波羅蜜品中說：過去如、未來如、現在如，如來如，一如無有異、復次，先論議中已破生法；若無生者，未來、現在亦無生，故三世平等。又復過去世無始，未來世無後，現在世無住；以是故，三世平等名如如。行是如已，入無量法性中。

法性者：法名涅槃，不可壞，不可戲論。法性名本分種，如黃石中有金性，白石中有銀性；如是一切世間法中，皆有涅槃性。諸佛賢聖，以智慧、方便、持戒、禪定，教化引導，令得是涅槃法性，利根者即知是諸法皆是法性；鈍根者方便分別求之，乃得法性；諸法如水性下流，故會歸於海，會爲一味。諸法亦如是，一切總相、別相，皆歸法性，同爲一相，是名法性。諸法由智慧分別，推求已到如中，從如入自性，如本末生，滅諸戲論，是名爲法性。

實際者：法性名爲實際，入處名爲際。復次，一一法有九種：一者、有體；二者，各各有法；如眼、耳雖同爲四大造，而眼獨能見，耳無見功；又如火以熱爲法，而不能潤；三者、諸法各有力；如火以燒爲力，水以潤爲力；四者、諸法各自有因；五者、諸法各自有緣；六者、諸法各自有果；七者、諸法各自有性；八者、諸法各自有障礙；九者、諸法各自有開通方便。諸法生時，體及餘法，凡有九事。知此法各各有體法具足，是名世間下如

。知此九法終歸變異盡滅，是名中如。譬如此身生，從不淨中出，雖復澡浴嚴飾，終歸不淨。是法非有非無，非生非滅，滅諸觀法，究竟清淨，是名上如。

復次，有人言：是九事中有法者，是名如，譬如地法堅重，水法冷濕，火法熱照，風法輕動，心法識解；如是等法名爲如。如經中說：有佛無佛，如、法相、法位，常住世間，所謂無明因緣諸行，常如本法。法性者，是九法中性，實際者，九法中得果證。

諸法實相，常住不動，衆生以無明等煩惱故，於實相中轉異邪曲；諸佛賢聖種種方便說法，破無明等諸煩惱，令衆生還得實性，如本不異，是名爲如。實性與無明合，故變異則不清淨；若除却無明等，得其真性，是名法性清淨，實際各入法性中，知法性無量無邊，最爲微妙，更無有法勝於法性，出法性者，心則滿足，更不餘求，則便作證。譬如行道，日日發引而不息，到所至處，無復去心。行者住於實際，亦復如是，若菩薩入是法性中，立知實際，若未具足六波羅蜜，教化衆生，爾時若證，妨成佛道；是時菩薩以大悲精進力故，還修諸行。

復次，知諸法實相中無有常法，無有樂法，無有我法，無有實法，亦捨是觀法；如是等一切觀法皆滅，是爲諸法實如涅槃，不生不滅，如本末生。用諸觀法，如水得火，若滅諸觀法，如火滅水冷，是名爲如；如實常住，何以故？諸法性自爾。譬如一切法皆從空分，諸法中皆有涅槃性，是名法性。得涅槃種種方便法，亦名爲法性，若得證時，如、法性則是實際。復次，法性者，無量無邊，非心心數法所量，是名法性。妙極於此，是名實際。

佛言：「菩薩摩訶薩欲數知三千大千世界中大地諸山微塵；欲析一毛爲百分，欲以一分毛，盡舉三千大千世界中大海、江河、池泉諸水，而不擾水性；欲三千大千世界中，諸火一時皆然，譬如劫盡燒時欲一吹令滅；欲三千大千世界中，諸大風起，吹破三千大千世界及諸須彌山，如摧腐草；欲以一指障其風力令不起者，當學般若波羅蜜。」佛不讚歎諸菩薩六度等諸功德，而讚歎

此等大力者，蓋衆生有二種：一者、樂善法；二者、樂善法果報。爲樂善法者，讚嘆諸功德；爲樂善法果報者，讚歎大神力。有人言：四大之名，其實亦無邊無盡，常在世故，無能悉動，量其多少。人雖造作城郭台殿，所用甚少。地之廣大，載育萬物，最爲牢固；爲是故佛說三千大千世界中地及須彌諸山微塵，皆欲盡知其數，及一一微塵中衆生業因緣，各各有分；欲知其多少，當學般若波羅蜜。如法華經說：譬如三千大千世界地及諸山，末爲微塵，東方過千世界下一塵，如是過千世界，復下一塵，如是盡三千世界諸塵。佛告比丘：是塵數世界，算數籌量可得知不？諸比丘言：不可得知！佛言：所可著微塵、不著微塵諸國，盡皆末以爲塵，大通慧佛，出世以來劫數如是。如是無量恆沙等世界微塵，佛、大菩薩皆悉能知，何況一恆河沙等世界！

行般若波羅蜜，云何能得是智慧？蓋行般若波羅蜜，滅諸煩惱及邪見戲論，入菩薩甚深禪定，念智清淨增廣故，則能分別一切諸色微塵，知其數量。復次，諸佛及大菩薩，得無礙解脫故，過於事，尙不以爲難，何況於此！復次，有人謂地爲牢堅，心無形質，皆是虛妄；以是故，佛說心力爲大。行般若波羅蜜故，散此大地以爲微塵。以地有色、香、味、觸故，自無所作；水少香故，動作勝地；火少香、味故，勢勝於水，風少香、味、色故，動作勝火；心無四事故，所爲力大。又以心多煩惱結使繫縛故，令心力微少。有漏善心，雖無煩惱，以心取諸法相故，其力亦少。二乘無漏心，雖不取相，以智慧有量，及出無漏道時，六情隨俗分別，取諸法相故，不盡心力。諸佛及大菩薩，智慧無量無邊，常處禪定，於世間涅槃無所分別。諸法實相，其實不異，但智慧有優劣。行般若波羅蜜者，畢竟清淨，無所罣礙，一念中能數十方一切如恆河沙等三千大千世界、大地諸山微塵，若離般若波羅蜜，則不能如上所知。以是故說：欲得是大神力，當學般若波羅蜜。

菩薩行般若波羅蜜，因禪定得神通，能變身令大，口風能滅大火，能摧破大山。菩薩智慧故，力能制之。以是故佛說：能一指障其風力，當學般若波羅蜜，所以者何？般若波羅蜜實相，

無量無邊，能令指力如是。

佛言：「菩薩摩訶薩欲一結跏趺坐，徧滿三千大千世界中虛空者，當學般若波羅蜜。」菩薩以梵天王三千世界，生邪見心，自以爲大，見菩薩結跏趺坐滿虛空，則憍慢心息。又於神通力中巧方便故，一能爲多，多能爲一；小能作大，大能作小。亦爲欲現希有難事故，坐徧虛空；亦爲遮諸鬼神龍王惱亂衆生故，坐滿虛空，令衆生安隱。以是故說：菩薩摩訶薩欲一結跏趺坐，徧滿三千大千世界虛空，當學般若波羅蜜。

佛言：「（菩薩摩訶薩）欲以一食，供養十方各如恆河沙等諸佛及僧，欲以一衣、華香、瓔珞、末香、塗香、燒香、燈燭、幢幡、華蓋等，供養諸佛及僧，當學般若波羅蜜。」供養功德，在心不在事，若菩薩以一食大心，悉供養諸佛及僧，亦不以遠近爲礙，是故諸佛皆見皆受。僧雖無一切智，不見不知，而因其供養，施者得福。如慈三昧，於衆生雖無所施，而行者功德無量。

菩薩無量無盡功德成就，以一食供養十方諸佛及僧，皆悉充足，而亦不盡；菩薩於此以一鉢食，供養十方諸佛，而十方佛前飲食之具，具足而出。菩薩行般若波羅蜜，得無量禪定門，及得無量智慧方便門，以是故，無所不能。以般若波羅蜜無礙故，是菩薩心所作亦無礙。是菩薩能供養十方千萬億恆河沙等諸佛及僧，何況如一恆河沙！供養衣服、華香……華蓋等亦如是。

佛言：「菩薩摩訶薩欲使十方各如恆河沙等世界中衆生，悉具於戒、三昧、智慧、解脫、解脫知見，令得須陀洹果、斯陀含果、阿那含果、阿羅漢果，乃至得無餘涅槃，當學般若波羅蜜。」須陀洹果有二種：一者、佛說三結斷，得無爲果。又如阿毗曇說：八十八結斷，得無爲須陀洹果。二者、信行、法行人，住道比智中，得須陀洹果證者是。復次，須陀名流，即是八聖道分；般那名入，入是八聖道分流入涅槃，是名初觀諸法實相。得入無量法性分，墮聖人數中，息忌名一，伽彌名來，是人從此死，生天上，天上一來，得盡衆苦，阿那名不，伽彌名來，是名不來相。是人欲界中死，生色界、無色界中，於彼漏盡，不復來生。阿羅漢盡一切煩惱故，應受一切天龍、鬼神供養。是阿羅漢有九種

，如先說。及八背捨、八勝處、十一切處、滅盡定、無諍三昧、願智等，阿羅漢諸妙功德，及得無餘涅槃。無餘涅槃，名阿羅漢捨此五衆，更不復相續受後五衆，身心皆悉永滅。後三道果，如初道說。

佛言：「菩薩摩訶薩，行般若波羅蜜布施時，應作是分別：如是布施，得大果報，如是布施……得入初禪、二禪、三禪、四禪，無邊空處、無邊識處、無所有處、非有想非無想處；因是布施，能生八聖道分；因是布施，能得須陀洹道乃至佛道，當學般若波羅蜜。」菩薩摩訶薩知諸法實相無取無捨，無所破壞，行不可得般若波羅蜜，以大悲心還修福行；福行初門，先行布施。菩薩行般若波羅蜜，智慧明利，能分別施福；施物雖同，福德多少，隨心優劣。如舍利弗以一鉢飯上佛，佛即回施狗而問舍利弗：汝以飯施我，我以飯施狗，誰得福多？舍利弗言：如我解佛法義佛施狗得福多。舍利弗者，於一切人中智慧最上，而佛福田最爲第一，不如佛施狗惡田得福極多。以是故，知大福從心生，不在田也。如舍利弗千萬億倍，不及佛心。

良田雖得福多，而不如心，所以者何？心爲內主，田是外事故。或時布施之福在於福田；以福田妙故，得大果報，當知大福由良田出。若大中之上，三事都具：心、物、福田，三事皆妙；如般若波羅蜜品中說，佛以好華散十方佛。復次，如以般若波羅蜜心布施，無所著故，得大果報。爲涅槃故施，亦得大報；以大悲心爲度一切衆生故布施，亦得大報。大果報者，如中說，生刹利家乃至得佛道者是。若有人布施及持戒故，得人天中富貴。如有人至心布施、持戒故，生刹利家，刹利者，王及大臣。若著於智慧經書而不惱衆生，布施、持戒故，生婆羅門家。若布施、持戒清淨，供養父母及其所尊，心欲求勝，生三十三天。若布施、持戒，令二事轉勝，好樂多聞，分別好醜，愛樂涅槃，心著功德，生兜率天。有人布施、持戒，修布施時，其心得樂，若施多樂亦多，如是思惟，捨五欲，除五蓋，入初禪，乃至非有想非無想亦如是。四禪、四無色定義，如上說。有人布施佛及佛弟子，從其聞說道法，是人因此布施故，心得柔軟，智慧明利，即生八

聖道分，斷三結，得須陀洹果，乃至佛道亦如是。

因是布施聞其說法，便發阿耨多羅三藐三菩提心。未離欲布施，生人天富貴，及六欲天中，若離欲心布施，生梵天上乃至廣果天；若離色心布施，生無色天中；離三界布施爲涅槃故，得聲聞道；布施時惡厭憤鬧，好樂閒靜，喜深智慧，得辟支佛；布施時起大悲心，欲度一切，第一甚深畢竟清淨智慧，得成佛道。

佛語舍利弗：「菩薩摩訶薩，行般若波羅蜜布施時以慧方便力故，能具足檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。」舍利弗白佛言：「世尊！菩薩摩訶薩云何布施時，以慧方便力故，具足檀波羅蜜，乃至般若波羅蜜？」佛告舍利弗：「施人、受人、財物不可得故，能具足檀波羅蜜；罪、不罪不可得故，具足羅波羅蜜；心不動故，具足羼提波羅蜜；身心精進不懈故，具足毗梨耶波羅蜜；不亂不味故，具足禪波羅蜜；知一切法不可得故，具足般若波羅蜜。」

所謂慧方便，三事不可得者是。有二種不可得：一者、不可得者，二者、不可得者。得不可得者，墮於斷滅；若不可得者，是爲慧方便，不墮斷滅。若無慧方便布施者，取三事相，若以三事空，則取無相。有慧方便者，從本以來不見三事相，以是故慧方便者，不墮有無中。復次，布施時壞諸煩惱，是名慧方便。於一切衆生，起大悲心布施，是名慧方便。過去、未來無量世所修福德布施，回向阿耨多羅三藐三菩提，亦名慧方便。於一切十方三世諸佛及弟子所有功德，憶念隨喜布施，回向阿耨多羅三藐三菩提，是名慧方便。如是等種種力，是爲慧方便義。乃至般若波羅蜜慧方便，亦如是。

佛言：「菩薩摩訶薩欲得過去、未來、現在諸佛功德，當學般若波羅蜜。」三世佛功德皆不可得，云何言欲得三世佛功德，當學般若波羅蜜？即使不言欲得三世佛功德，自欲得如三世佛功德無所減少耳。所以者何？一切佛功德皆等，無多無少。諸佛大悲，徹於骨髓，不以世界好醜，隨應度者而教化之，如慈母愛子子雖沒在厠溷，勤求拯救，不以爲惡。以是故，菩薩摩訶薩欲得三世佛功德，當學般若波羅蜜。

(完)